

Seminar „Aktuelnosti u radu FGU – Adresni registar i Nacrt zakona o izmjeri i registraciji nekretnina“

28.01.2015 15:48



U skladu s godišnjim planom aktivnosti CILAP projekta, u Čitluku je 27. 1. 2015. godine održan seminar „Aktuelnosti u radu FGU – Adresni registar i Nacrt zakona o izmjeri i registraciji nekretnina“. Seminaru je prisustvovalo oko 70 učesnika, među kojima su bili i načelnici općina: Čapljine, Gruda, Posušja i Čitluka, te velik broj šefova službi nadležnih za geodetske poslove jedinica lokalne samouprave. Seminar je organiziran za predstavnike jedinica lokalne samouprave iz pet kantona: HNK, ZHK, HBK, SBK i USK.

Seminaru su prisustvovali direktor FGU-a gosp. Željko Obradović i direktorica CILAP projekta gđa Anđa Zimić. Oni su prisutne upoznali s aktuelnostima u radu FGU i aktivnostima CILAP projekta, s posebnim

težištem na aktivnosti koje su prezentirane na seminaru. U uvodnom dijelu seminara prisutnima se obratio i gosp. Ivo Jerkić, načelnik općine Čitluk, koji je izrazio zadovoljstvo saradnjom s Kantonalnom upravom za geodetske poslove HNK, FGU-om i CILAP projektom na implementaciji projekta uspostave adresnog registra za dio općine Čitluk.

Aktivnosti koje se u HNK-u i u sklopu CILAP projekta provode na uspostavi adresnog registra prezentirao je gosp. Adelko Krmek. Za prisutne predstavnike jedinica lokalne samouprave posebno je bio zanimljiv dio prezentacije koji se odnosio na dosada stečena iskustva u vezi s procedurama koje je potrebno provesti kako bi se uspostavio adresni registar. Također je prezentirana i aplikacija za uspostavu i vođenje adresnog registra koja je razvijena u sklopu CILAP projekta, a koju je FGU spreman besplatno ustupiti svim jedinicama lokalne samouprave, koje se oduče krenuti u uspostavu adresnog registra.

Nacrt zakona o izmjeri i registraciji nekretnina prezentirao je gosp. Ivan Lesko. U prezentaciji je kratko prezentiran sadržaj zakona, nakon čega je detaljnije objašnjen registar nekretnina, koji se u skladu s nacrtom zakona treba uspostaviti kao zajednička baza podataka katastra nekretnina i zemljišne knjige. Prezentirana je nacrtom zakona definirana stručna i upravna struktura geodetske djelatnosti. Na kraju prezentacije istaknute su prednosti za jedinice lokalne samouprave, koje će donijeti usvajanje zakona.

Prisutni učesnici izrazili su zadovoljstvo sadržajem seminara i ukazali na potrebu održavanja većeg broja sličnih skupova s ciljem upoznavanja čelnika jedinica lokalne samouprave sa sadržajem Nacrta zakona o izmjeri i registraciji nekretnina.

Seminar za predstavnike jedinica lokalne samouprave iz ostalih 5 kantona bit će održan u Tešnju 3. 2. 2015. godine.